

REMARQUES
D'ESTAT ET
N. 4 D'HISTOIRE, *34*
SUR LA VIE ET
les services. *8. 1661*
DE *(M. de V.)*
MONSIEUR DE
VILLEROY.

P. P. M. *8*



A ROUEN.

Chez THOMAS MALLARD
dans la Cour du Palais.

M. DC. XVIII. *88*



AV ROY,



IRE,

Voicy des ruines
d'un excellent e-
difice, d'où l'on
tirera de belles & rares pieces
pour enrichir les nouveaux basti-
mens. Ce sont les observations
de la bonne conduite qu'a tenu le
plus ancien de vos Conseillers d'E-
stat durant cinquante six ans de
service, aux plus grandes affaires
de vostre Couronne. Ceux qui

ne font moins de gloire d'imiter
 les merites que de succeder aux
 honneurs se serviront de son exem-
 ple comme d'un flambeau allumé
 par la verité, fille aisnee de la lu-
 miere. S'ils le suivent *Et* que le
 vent de la Passion ou de l'intérêt
 ne le fasse fondre ou couler, les bon-
 nes intentions de V. M. seront
 toujours secondees de bons conseils
 & vos desirs de grands *Et* glo-
 rieux effects.

P. MATTHIEV.



ADVERTISEMENT.




VI NE DONNE DES HONNEURS A M. DE VILLEROY LES REFVSE A LA VERTV : Je me trouuay aux derniers que luy furent rendus à Lyon en l'Eglise des Minimes , & y entendis le docte discours de celuy que HENRY LE GRAND a tant chery & estimé, qui a esté plus de quatorze ans le Chrysostome de la Cour, & de qui la France peut dire plus veritablement que la Grece de Pericles que le Temple de la Persuasion est sur ses leures.

Et bien qu'il n'oubliaſt rien de ce qui appartient au merite & à la dignité de ceste occasion, ie creu que pour s'estre si bien acquitté ie ne demeure pas des-obligé de ce que ie deuois a la memoire de ce Seigneur.

Il a moissonné tout ce qu'il y auoit.

d'exquis & d'excellent sur ce sujet, ie ne fais que glaner apres luy. Mais il suffit que ie fasse cognoistre que comme pour faire le pourtrait de Mercure à Athenes, on prenoit celuy d'Alcibiades, aussi pour dresser parfaictement vn homme d'Estat il se faudra seruir de celuy de M.
DE VILLEROY.





REMARQUES D'ESTAT.

POUR viue & forté que soit l'apprehension d'un noble esprit, il a besoin de secours & de conduite, & les plus grands hommes se font de la main de ceux qui les ont precedé, en la profession qu'ils veulent suiure: C'est monter au plus haut degré de l'admiration de n'imiter personne, & estre imité de tous. Satrius Rufus suiuit Ciceron, cestuy cy trouua les fleurs de l'Eloquence Grecque dans les actions de Demosthene, qui faisoit gloire d'imiter Pericles, Pericles auoit pour patron Pisistrate, & i'estime qu'il n'y a homme d'Estat qui refuse d'aller au maniement des affaires sur les brisées de M. de VILLE-ROY, & ne tire au profit de ses experiences.

Ce nom d'homme d'Estat a l'estenduë si grande & prend des qualitez si hautes & excellentes qu'il rencontre peu de sujets qui en soient dignes. Il n'appartient qu'à celuy qui n'a iamais flestry sa reputation par quelque acte d'infidelité; a cognoissance parfaicte des hommes, des affaires & des pays, est sçauant à toutes sortes d'occurrences, & neantmoins n'estime pas les autres ignorans, ne presume de sçauoir tout, ne va pas tousiours mesme train, & ne se destourne iamais du bon chemin, ne montre en ses opinions rien qui resente l'impudence de la flatterie, ny la lâcheté de la seruitude, ne permet que son interest marche deuant le public, ne resoult rien par despit, chagrin, colere & soudaineté, quatre dangereux escueils des esprits prompts, & subtils. Il a en fin l'ordre en ses discours, le iugemēt en ses escrits, la sincerité en ses opinions, la constance & le secret aux commandemens, & la diligence & facilité aux resolutions.

LA science Royale qu'on appelle la raison d'Estat ou la Prudence Poli-

tique, consiste en vne vigoureuse force d'esprit, & vne experience consommee au mamiment des affaires publiques, dont la cognoissance est si difficile, que la vie est trop courte pour l'apprendre. La sagesse comprend les choses qui vôt à la demonstration & à la constance, la Prudence s'exerce dans les changemens & les reuolutions, celle là tient tousiours le grand chemin de la Loy, & de la raison, celle cy s'en escarte & dero-ge au droit commun.

Pource H E N R Y L E G R A N D peu de temps auant sa mort perpetuellement deplorable, disoit qu'il cōmen-çoit de sçauoir que c'estoit que de regner, & ne l'auoit appris que dans l'experience qu'il apelloit son grand liure, où *l'on n'estudie long temps sans estre sçauant.*

Tellement que comme il est impossible de treuver vne republique telle que Platon l'a bastie, ny vn Orateur tel que Ciceron le represente, ny vn capitaine de la main de Xenophon, aussi est il impossible de treuver vn homme d'Estat de la perfectiō qu'il le faut pour conseiller vn grand Prince, ou assister

le regime d'une puissante Republique.

LA France qui n'a iamais esté sterile en la production des hommes de ceste science n'en a point veu qui ait commencé la profession plustost, & l'ayt exercé plus longuement que M. DE VILLEROY, & si en ce dernier acte de la Vie le desir de ioindre à l'Eternité luy a permis de penser au monde, ie ne doute point qu'il n'ayt ressenty ceste consolation, qu'il ne laissoit rien apres luy qui eust seruy le Roy & l'Estat, plus de temps, avec plus de creance ny en de plus grandes occasions que luy. *Qui est admiré de tous ne peut estre en sa profession comparé à personne.* Il faut estre monté bien haut pour atteindre à des qualitez si releuees.

Il a seruy cinq Roys, a trauaillé cinquante six ans, en a vescu soixante & quatorze, a veu la fin des guerres estrangeres, le commencement des ciuiles, les esperances, & les faueurs croistre, monter, & descendre; La Cour monstre à deux cœurs & deux langues, si féconde aux changemens, si constante en son

inconstance , luy fournit des exemples qu'il pouuoit rapporter a toutes sortes d'euenemens.

IL ne vint pas seul à la Cour , ny sans conduite pour y faire fortune. Les richesses que son Grand pere luy auoit laissées , & la consideration des seruices par luy mesme rendus au Roy François en Italie, à la Regente sa Mere en son absence , l'auoient desia tiré hors du commun. Puis la liberalité de son Pere, & son mariage à dixhuiët ans avec la fille de l'Aube-espine, Secretaire des commandemens, & le plus confident des seruiteurs de la Royne Mere l'assurerent que rien que le temps ne s'opposeroit à sa fortune.

Il est bien mal-aisé de la bastir à la Cour, quelque grande industrie que l'on y porte, si vne puissante faueur ou quelque grand seruice n'en iettent les fondemens. Combien de beaux esprits se flestrissent pour n'auoir ce Soleil au leuant? Cesont pierreries qui perdent beaucoup de leur prix & de leur beauté pour n'estre bien mises en œuvre.

IL tira encores vn autre grand aduantage d'estre venu aux affaires en ceste premiere ieunesse. *Il est mal aisé de reussir à la Cour sur le tard.* Que de tēps pour apprendre à demesler tant de fuseses? Que de veilles pour arriuer au repos? Que d'affronts pour rencontrer de l'hōneur? Que de calomnies pour se tirer hors de l'enuie? Il y a des choses rudes & fascheuses que la patience, & l'accoustumance rendent faciles & supportables? & principalemēt vn certain aneantissement de ses propres humeurs, *Qui pense reseruer entiere sa propre volōté ne peut faire grand progrès à la Cour.* C'est vne priſō à l'entree de laquelle il faut poser les armes, c'est à dire, la liberté, le contētement, le repos, & ne retenir que la Patience & l'Esperance? Et c'est pour ce que M. D E V I L L E R O Y disoit si souuent *qu'il ne faut iamais rien desesperer à la Cour, & que la Patience & l'importunité viennent à bout de tout.*

LA Royne Catherine qui auoit tant de iugement à choisir les esprits, tant de liberalité pour les obliger, l'employa aux affaires, l'enuoya en Espagne

pour l'execution de quelques articles de la Paix de l'annee M. D L I X. & à Rome vers le Pape pie I I I I. pour le differend de la presceance, qui n'auoit iamais esté disputé à la Couronne Treschrestienne. I'ay regret escriuant cecy d'estre eslongné de plus de cent lieuës de l'Original d'une lettre de sa main sur le suiet de sa legation si i'auois moyen d'en rapporter quelque trois, on verroit que son entendement alloit desia d'un air tout autre que les communs.

Aussi la premiere piece de l'equipage d'un homme d'Estat, c'est le iugement bon & ferme. Les bons esprits avec peu de peine, peu de temps & beaucoup d'adresse, arriuent où ils veulent: les autres qui sont lourds & pesans sont terres steriles, que plus on cultiue moins ont de fruct ou cōme les ignorās mariniens, qui se plaignent tousiours de la mer ou du vent & ne donnent dans le port que par hazard. Un esprit fort libre & adroit se cognoit dās les conseils, les despeschés & les affaires: & comme il cōçoit les choses autrement que les autres, aussi ses paroles ne sont pas com-

munés, vont tousiours au point, & par des moyens qui paroissent le moins. Il est subtil aux raisons, prompt aux reparries, comprend facilement : ses resolutions sont claires & nettes, il n'est point confus au discours, a de la grace aux choses feintes, de la grauité aux veritables, il sçait comme il faut proposer vne affaire, la diuiser, poursuiure, & acheuer.

EN ce commencement il eut l'œil fort ouuert de ne rien commettre contre la bonne opinion. Telle qu'on void naistre la reputation elle croist ou s'abaisse. Sur tout il faut desirer celle de la probité, car toutes les vertus seruent de peu, si elle manque: c'est le fond de ce vase qui se rompant tout ce que lon y met s'escoule. *Les Paroles d'un homme de bien valent des sermens*, il parle aux hommes comme s'il parloit à Dieu, il nōme les choses par leur nom, fauorise ouuerement les bons, aduise doucement ceux qui faillent, n'a point d'oreilles pour les mauuais rapports, mesdisances, & flatteries, & s'il faut vser de la *disimulation*, ceste nouvelle vertu de *Cour*, il le fait si sobrement que l'innocence ny la verité ne

s'en peuuent plaindre. Il ne desire point faire paroistre ce qu'il peut pour nuire à personne.

A Son retour du voyage d'Italie la Royne Mere le fit receuoir en la suruiuance de la charge de l'Aube-espine son beau Pere, & recommanda sa fidelité & sa vigilance au Roy Charles IX. qui l'appelloit son Secretaire, luy confioit ses plus intimes pensees, luy dicta vn liure de la Chasse, & quelques Poëmes, & entre autres celuy qu'il adressa à Ronsard, où il luy dit.

*Ton esprit est Ronsard plus gaillard que
le mien,*

*Mais mon corps est plus ieune & plus fort
que le tien.*

La responce de Ronsard commençoit en ceste sorte:

*Charles, tel que ie suis vous serez quelque
iour,*

*L'age vole tousiours sans espoir de re-
tour.*

Mais comme rien ne manque où la grace de Dieu abonde, ie tiens que rien n'ayda tant à son aduancement que le zele ferme & constant qu'il conserua en

l'ancienne religion au temps que les plus grands entendemens prenoient la trauerse, que la nouveauté, qui a des charmes si puissans sur les François, auoit desbauché plusieurs beaux esprits dans les Escoles, & les parlemens. Car apres le Colloque de poissy, l'Edict de Ianuier ayant ouuert le Temple, & permis autel contre autel, les principales villes du Royaume surprises, il y eust vn tel esbranlement, que i'ay ouy dire au Roy HENRY LE GRAND, & a des plus vieux que luy, que la Royne Mere pour s'accommoder au temps, & complaire aux plus forts, faisoit contenance de n'estre pas ennemie de ceste nouveauté, & permettoit en son cabinet de marques de son affection. *La necessité est vne violente & rude conseilhere aux affaires.*

Ce ieune homme demeurant ferme au train de l'antiquité, & abhorrant ce renuersement de l'ancienne discipline & Ierarchie, estoit mocqué de ceux qui croyoient que le chemin qu'ils tenoient estoit le plus assésuré pour le salut, & le plus court pour la fortune, ayant en la Cour des protections puissantes, mais

ceste constance augmenta ceste premiere affection que le Roy Charles luy portoit. La bienueillance des Roys est acquise ou cultiuee par ceux , qui s'accommodent aux premieres inclinations de leur ieunesse, ou aux exercices & passios de leurs plaisirs, ou à l'acroissement de leurs finances , ou à l'estenduë de leurs conquestes. Tous les autres chemins ne sont pas asseurez , & quand on y est arriué, le meilleur est celuy de la Fidelité & de la Modestie.

AL'age de 24. ans il exerça seul la charge de Secretaire d'Estat & celle de Sauue estant vacante y fust vnüe. On ne la voyoit pas en ce temps là en telle splendeur & consideration que elle treuve maintenant. I'ay faict veoir ailleurs que sous Louys XI. il n'y auoit point de Secretaire des commandemēs, & que le premier qui se trouuoit à la chambre receuoit celuy de l'expedition qui estoit resoluë & ordonnee entre le Roy , & les Principaux Seigneurs de son Conseil, de maniere qu'on treuve plusieurs grandes actions soubscrites & signees par diuers Secretaires.

Mais tousiours il y auoit aupres du Prince quelque homme cōfident qui auoit le soin des resolutiōs plus secrettes, & l'expedition des plus importantes. Tel fut la Balue sous Louys XI. Briçonnet sous Charles VIII. Le Cardinal d'Amboise & Robertet sous Louys XII.

LE Chancelier de l'Hospital & Moruilliers Euesque de Orleans Garde des Seaux, & l'Aube-espine Euesque de Limoges, trois grands hommes de ce siecle, qui auoient le premier soin des affaires du Roy, luy firent part de leurs experiences, & le rendirent capable d'*admirer peu de chose, & d'en sçauoir beaucoup.* Les Diamans se polissent par les Diamans, & les esprits se raffinent par les esprits, & dans les affaires, qui pressent & rauissent les naturels plus pesāt & stupides, comme les torrens emportent & destachent les plus lourds caillous. Et comme pour estre eloquent il se faut proposer limitation des plus parfaictes pieces des anciens Orateurs, de mesme pour dresser vn braue esprit aux affaires d'Estat, le plus court chemin est sur l'exemple de ceux qui les ont traittez

longuement. *On aduance plus sur l'exemple & le travail mesme, que sur les preceptes & les discours.*

Mais comme on ne rencontre pas tousiours de grandes occasions pour exercer les entendemens, ny de grands entendemens pour traicter les grandes occasions : c'est vn grand bon-heur à ceux qui ont la communication facile, & la conuersation familiere avec ces habiles hommes, qui esleuez sur les plus hautes Spheres du Gouvernement voyent plu-
stost que les autres l'orage & la serenité, iugent de loin les euenemens, cognoissent la source, la suite, & les consequences des affaires: car comme on se baigne au Soleil, & on se parfume dans les odeurs sans peine, ils forment leur iugement à toutes sortes de resolutions.

L commença ses labours sur les grāds ouvrages, & deslors son esprit ne rampant aux choses vulgaires se guinda à tire d'aile aux plus hautes, comme à son centre. *Il faut qu'un homme d'Etat cognoisse la porree de son esprit, & iusques où il peut aller.* Il y en a que plus ils sont esle-

ués moins ils paroissent, & d'autres qui ne veulent auoir tant de iour pour bien paroistre, car les charges & les affaires descouurent les hommes. *Telles a qui en seroit estimé digne s'il ne les auoit point.*

La comparaison de la diuersité des esprits à celle des statues n'est pas impertinente. Les Atheniens employèrent deux excellens Sculpteurs pour faire la teste de Minerue, Phidias, & Alcmenes, & les considerans ensemble apres qu'elles furent faictes, se mocquerent de celle de Phidias qui n'estoit que grossierement esbauchée, & admirerent l'autre qui auoit par vn grand artifice tous les traits delicats & radoucis.

Mais quand elles furent montées sur deux hautes colonnes, celle de Phidias racourcie par l'esslongnement à sa deuë proportion parut parfaictement belle & celle d'Alcmenes ^{parut} ~~parut~~ sa forme, la hauteur luy desrobant tellement sa beauté qu'elle ne paroissoit que comme vne boule mal arrondie.

De mesmes il y a des esprits qui paroissent selon qu'ils sont plus ou moins

esleuez; les vns n'ayant point de vigueur s'ils ne sont tousiours dans les plus hautes regions des affaires, les autres ne vont pas si haut & leur suffisance ne monte qu'à certain degré, passé lequel on ne les cognoit plus, & eux-mesmes ont peine de se cognoistre. *La teste tourne & les yeux s'esblouyssent aux lieux esleuez.*

Il n'y auoit point de petites affaires au Conseil du Roy en ce temps là, toutes les despeschés tenoient du grand, & tous les conseils alloient aux batailles, & aux victoires. Je luy ay ouy dire qu'il s'estoit aydé à faire l'Edit de pacification des premiers troubles, l'an M. DLXIII. Le different de la Religion qui auoit diuisé les François au seruice de Dieu les tenoit encores diuisé en l'obeïssance du Roy.

De là s'estoyent formées deux grandes parties desquelles la Religion estoit le pretexte, & le Gouuernement la cause. Le Concile de Trente tenoit tout le monde aux escoutes. Le passage du Duc d'Albe en Flâdres donnoit de la peur aux vns, & de l'audace aux autres. Après que la Royne mere eut remis le pou-

uoir de la Regence au Roy , elle luy fit voir les Prouinces de son Royaume. L'Entreueuë de ce Prince avec la Royne d'Espagne à Bayonne; & les conseils secrets entre la Royne Mere, & le Duc d'Albe formerent de grands desseins. Le Roy estant à Meaux vid les forces du Prince de Condé si proches , qu'il fut cōseillé de se couler à Paris de nuit sous la conduite des Suisses. Il y eut vne conference à S. Denys entre les Deputez du Roy, le Chancelier de l'Hospital , l'Euesque d'Orleans, Limoges , S. Sulpice, avec Monsieur le Prince de Condé , & Villeroy s'y trouua. Elle fust suiuite de la bataille où le Connestable mourut, Monsieur le Duc d'Anjou fust déclaré Chef & Lieutenant de l'armee, l'Aubespine mourut le lendemain, & Villeroy entra seul en la charge , & le temps y mit encores plus de besongne que l'on ne luy en auoit laissé.

LE Roy Charles IX. l'enuoya vers l'Empereur Maximilian , pour le traicté de son mariage, avec la Princesse Elizabeth. Ce troisieme voyage, ayda bien à luy former & fortifier le iuge-

ment, aussi faut-il que ceux qui veulent estre employez aux grandes affaires, ayent veu les Prouinces estrangeres, & principalement les voisines qui peuuent estre ennemies. Mais si la curiosité de voir n'est accompagnee de l'affection de iuger & de retenir ce qui se void, tout le profit se fond & resout en pure vanité.

Ce n'est pas assez d'admirer dans les Prouinces ce qui est rare, ou de se plaire à ce qui est agreable, il importe de considerer comme elles sont gouuernees, en paix & en guerre, comme le Prince est seruy, en quoy consistent ses forces, ce qui luy manque, comme sont basties, munitionees & gardees ses forteresses, comme il entretient sa milice, par où il peut estre ou attaqué ou surpris, *s'il a plus de bois pour eschauffer son four, qu'il n'a de bled pour enuoyer au moulin.*

Les ieunes gens remarquent volontiers les vices des nations, & en rapportent des semences de querelles, quand ils les reprochét à ceux qui se passionent tousiours pour en souter l'honneur, & qui croyent que leur particulier est

toufiours excepté des vices communs.

L'ignorance des affaires & eſtrangers & domeſtiques n'eſt pas moins honteuſe à l'homme d'Eſtat que celle du Medecin qui ne cognoit le temperament du corps humain. Ignorance que porte les Princes à de ruineux deſſeins avec telſaueuglement qu'ils font ſouuēt la guerre à ceux auxquels ils doiuent demander la Paix.

LE Roy preuoyant que la courſe de ſa vie ne ſeroit pas longue, le recō-manda à ſon frere allant en Polongne. Il mourut au bois de Vincennes, & l'affection qu'il luy portoit le remit en ſa memoire lors meſme qu'il n'en auoit plus pour les choſes du monde. Si ce Prince eut des conſeils extremes Villeroy ne les luy donna pas car il luy dit ſouuent que le Prince qui auoit plus de ſoin de ſe faire craindre qu'aymer eſtoit aſſeuré d'eſtre à la fin plus hay que craint. *La crainte eſt vne mauuiſe eſcole du deuoir.* Ceſte parole cruelle & abominable. **QV'ILS HAISSENT POUR VEY QV'ILS CRAignent**, n'eſt pas Chreſtienne, les Ro-mains

maines mesmes ne l'ont cogneue que du temps de Scylla.

LE seruice de VILLEROY estoit desia si necessaire qu'a pres la mort de son premier Maistre, il ne fut moins chery du second. Descourant ceste noire nuee qui se creua en prodige de reuolte & sedition, il donne au Roy ce iuste conseil, de reunir la maison Royale en mesme creance & mesme dessein, & de ne diuiser les Catholiques, afin qu'ils ne recogneussent pour chef autre prince que le legitime.

Il l'employa pour faire reuenir à la Cour les deux personnes qui luy estoyēt les plus cheres, le Duc d'Alençon, & le Roy de Nauarre. *L'ambition qui considere plus l'estendue du desir que du deuoir*, luy auoit desrobé l'affection de l'un, & les nouvelles opinions contre l'ancienne creance, auoient desbauché la conscience de l'autre. Il leur enuoya la Royne sa Mere, & voulut que elle fust assistee de VILLEROY en ceste negociation. *C'est vn grand bon heur à vn seruiteur, quand il est employé à faire l'accord des enfans de la maison.*

L fust le premier qui eust cognoissance du dessein qu'il auoit de faire vn ordre nouveau de Cheualiers. Peut estre eust-il mieux fait de remettre celuy de S. Michel en honneur, comme l'Empeur Maximilian a esté loüé, d'auoir releué celuy du Toison. Ce Prince ayant d'autres pensées institua celuy du saint Esprit, & creut Villeroy luy représentant que le communiquant à peu de personnes, il en seroit plus illustre. *Le Prince doit estre retenu au departement des marques d'honneur, qui sont les vrayes recompenses du merite.* Il n'y a point d'apparence de refuser la Couronne à Themistocles qui vainquit les perses, à la iournee de Salamina, & l'accorder à Demosthenes qui s'enfuit du combat.

ON sçait comme les passions se desbriderent & desborderent sur ce Prince, & combien d'escrits insolemment libres se publierent contre luy, il en fit punir les auteurs, mais ce fut contre l'aduis de Villeroy, qui auoit appris des Sages que le papier endure tout, & que *plus les Satyres sont defendues plus on les recherche.*

Ce n'est pas le deuoir d'un homme d'Estat de bleſſer l'Eſprit de ſon Prince de toutes ſortes de bruits, ny enflammer ſon courroux contre ceux qui les inuentent ou les troublent, au preiudice de ſa reputation. Il n'y a ſorte d'offence qui ſe doiue plus diſſimuler que celle des langues, des plumes & des impreſſions.

Les ames genereuſes ſe tiennent aſſez vengees de faire cognoiſtre qu'elles ſe peuuent venger. Alexandre ſ'en moquoit, Auguſte les recompenſoit, Tibere les diſſimuloit, Tite les meſpriſoit. Il n'appartient qu'aux grands Roys de bien faire, & ouyr mal parler. Trois bons Empe- reurs Theodoſe, Arcadius & Honorius Pere, Fils, & Neueu, ont laiſſé ſur cela vne Loy ſi diuine, qu'il ſemble qu'elle ayt eſté dictée au Ciel. La voicy en François, telle qu'elle eſt en Latin au VII. Tiltre du Neufieſme liure du Code : Si quelqu'un par deſaut de Modeſtie, & excez d'impudence croit qu'il luy ſoit permis d'attaquer noſtre reputation, par des meſdiſances malignes & insolentes, & enyuré de ſa paſſion ſe rendre detracteur de noſtre Gouvernement, nous voulons que pour cela il ne

soit subiect à aucune peine , ne qu'il souffre rien de rude & rigoureux, car si c'est par legereté il le faut pardonner: si par fureur, il y a de la pitié: si par iniure, on le doit remettre : & partant nous voulõs qu'on nous en reserve l'entiere cognoissance, afin qu'en considerant la qualité des paroles par celle des personnes nous aduisions s'il les faut ou poursuivre, ou dissimuler.

LA complaisance est si commune auprès des Prince, qu'il faut auoir l'ame bien religieuse , pour n'aymer mieux complaire avec la verité , qu'estre agreable par la flatterie. Il n'y a rien aux Cours des Roys de si rare ny dangeux que la simple Verité. Vn Archeuesque de France disoit vn iour à la Royne Mere durant l'assemblée des Estats Generaux de Paris, Qu'il y auoit cinquante ans que la verité n'auoit passé par la porte de son Cabinet , & vn autre Euesque preschant au Louure l'annee passée disoit au Roy, Qu'elle n'entroit dans les maisons des Roys qu'à la desrobée, & par les fenestres: Le Prince est bien obligé à vn fidelle seruiteur qui la luy - dit avec hardiessa & discretion , & pour estre bien seruy il deuroit ordonner des honneurs.

& des recompenses affectees aux veritez qu'on luy diroit, en chose douteuse & importante, dont la retenue est prejudiciable.

La Royne Catherine aymoît quelque Seigneur de sa nation, VILLEROY, connoissant que les Princes & grands du Royaume s'en plaignoient, & que tousiours telles plaintes sont les semences des partialitez, eust la hardiesse de la supplier de moderer ceste affectiõ, ce qu'elle fit, & celuy qu'elle affectionnoit y apporta tant de modestie & de bonne conduite, que sa fortune ne fust iamais subiette aux mauvaises rencontres qui viennent tousiours au deuant de ceux qui abusent de leur faveur.

Le Roy Henry III. apres son retour de polongne, s'ennuya bien tost des exercices militaires pour laisser fondre cet humeur guerrier dans les delices & vanitez qu'apporte la Paix. Il institua diuerfes compagnies de seculiers qui vivoient non tousiours, mais à certaines heures regulierement. La principale retraite estoit au bois de Vincennes, où il attira les grands : & d'autant que les

affaires le suiuoient par tout, il voulut que Villeroy qui auoit le soin de celles qui difficilement se remettent au lendemain, prit l'habit comme les autres, & qu'il y eust vn lien particulier, comme vn parloir pour receuoir les pacquets & entendre les Courtiers. Mais comme il s'apperçeut que les expéditions en estoient retardees il luy dit aussi veritablement que genereusement, Sire les devoirs & les obligations sont considerees selon les temps, & pource on doit payer les vieilles debtes deuant les nouvelles. Vous avez esté Roy de France, premier que chef de ceste compagnie, vostre conscience vous oblige rendre à la Royauté ce que vous luy deuez, premier qu'à la Congregation ce que vous luy avez promis. Vous pouuez vous dispenser de l'vn & non de l'autre. Vous ne portez le sac que quand il vous plaist, mais vous avez tousiours la couronne sur la teste : & n'est moins pesante en ceste solitude que d'as les affaires. C'est parler.

Vn prince ne scauroit donner trop de temps à la Pieté, mais il faut quelquefois quitter Dieu pour Dieu, qui permet qu'on le trouue dans les affaires, & que la seule bonne intention le serue. Que

le Ciel soit de bronze pour la France tât que la piete viura au cœur de ses Roys elle n'a que faire d'autre pluye, non plus que l'Egypte qui s'en passe tant qu'elle a l'eau du Nil qui engresse & rafraischit ses terres.

Mais il la leur faut souhaiter toute pure , sans artifice & sans contrainte, marchant la teste droite sans la coucher ny deçà, ny delà. Elle fuit ces deux extremes, l'impieté & la superstition. plusieurs princes par celle-là ont braué Dieu, & ont mal pensé de luy par l'autre. L'impieté aveugle l'ame, la superstition la rend louche. *La Piete ayme Dieu, l'impieté le mesprise, comme s'il estoit homme, la superstition le craint, comme s'il n'estoit pas Dieu.*

VOyant que ce prince aymoît la solitude, & faisoit sa demeure ordinaire à Paris, il luy donna ce conseil d'enuoyer par les Prouinces des principaux Seigneurs de son Conseil pour y faire voir sa Maïesté pour les effects de sa Iustice, puis qu'elles estoïent priuées du contêtement de sa presence, imitât le Soleil qui ne bougeant du Ciel enuoye ses rayons.

par tout le monde. Quand ce sont gens de bien, & de qualité ils releuent par tout le seruice du Prince, leurs paroles sont autant de fiesches ardentes qui fondent la glace qui se forme quelquefois dās les parties eslongnees de la chaleur.

Vn Prince ne scauroit mieux cultiuet la bienueillance publique qu'en y employant des personnes qui n'affectiōnent que le bien public. De tous les preceptes que l'Empereur Charles laissa à son fils philippe II. on remarque cestuy cy pour le meilleur, *Que ne pouuant estre en tant de Prouinces esloignees & separees il fit en sorte qu'il y fust ven tousiours par son autorité & sa iustice, les deposant entre les mains de personnes de si grande innocence & vertu que ses subiets n'eussent occasion de regretter son eslongnement.*

LE Roy qui pour se venger proposoit de finir tragiquement l'assemblée des Estats de Blois, luy enuoya le billet de retraite, non pour autre raison que pour la crainte que luy & Belieure ne le destournassēt de ce precipice, & que dependans fort des volontez de la Reyne Mere ils ne luy en donnassent quelque

cognoissance. Car il redoutoit le Demon de ceste Mere qui auoit vn grand pou- uoir sur le sien , & luy ne voyoit pas clair dans ces artifices. *Les esprits des hommes sont mal aisez à cognoistre, mais on ne cogneut iamais celuy d'une femme.*

Il pensoit que le sang de ces deux Prin- ces esteindroit le feu qu'ils auoient al- lumé, & il le renflamme d'auantage ; car peu après on vit vne reuolte quasi gene- rale. On renouuella les Saturnales, où les valets faisoient les maistres , & les forçats ne quittent pas plus viste la rame au signal du Comite que les plus obligés se detraquerent de leur deuoir. Il offrit lors au Roy la continuation de son seruice que ses principaux seruiteurs abandonnoient , mais ne cognoissant la foiblesse de ses conseils il creut qu'il se pouuoit passer d'une personne si neces- saire & confidente.

Vn Prince se poche les yeux , quand inconsiderément il se desfait d'un ser- uiteur qui sçait ses affaires. Quasi toute la Polongne auoit conçu vne haine implacable contre gauaric le plus fidel- le, Conseiller du Roy Lescus le Blanc

le menaçant d'essire vn autre Roy, s'il ne le chassoit. Gauaric en estoit content, & prioit le Roy de la ietter dans la mer puis qu'il estoit cause de la tempeste, protestant que non seulement il perdroit volontiers sa patrie, mais la vie mesme pour le salut de son Prince & le repos de son Estat. Lescus declara qu'il *aymoit mieux se retirer & viure en personne priuee, que demeurer au regne sous vne condition tant inique, & desraisonnable.*

V Illeroy donc n'esperant ny seureté, ny protection de ce costé, se ietta dans le party où estoit son Pere, son fils sa femme, sa famille & ses biens. Il eust bien desiré d'attendre en l'vne de ces maisons que ce brouillas tombast, mais n'y pouuant demeurer, qu'à la discretion de la violence du temps, il fut contraint de quitter le chemin de la Iustice pour celuy de la prudēce. *Aux esmotions ciuiles le pire party est de n'en auoir point* : aux querelles particulieres c'est sagesse d'estre neutre. Qui regarde le lieu s'en va quand il veut, qui est de la partie n'est pas receu à la quitter sans la perdre.

Et neantmoins il fut entelle cōsideration dans les deux , qu'encores que la discretion & l'equité ne parussent en ces confusions qu'à la lueur des Arquebusades, tout ce que luy appartenoit fut respecté, sa famille ne ressentit des miseres du siege de Paris, ses amis luy faisoient tenir des viures secrettement, & quelquefois dans des tambours: sa maison de Conflans fust conseruée par vn Seigneur qui honoroit le pere & auoit esté instruit avec le fils. A la prinse de pontoyse vn Grand de ce Royaume eust le soin de faire conduire en vne ville forte de son gouuernemēt tous les meubles de sa maison d'Halincourt, & apres la paix les luy renuoya sur des chariots comme par inuentaire, sans que l'on s'aperceust de l'esgarement de la moindre piece. Iugement & preuoyance admirable d'auoir veu de si loin & contre les apparences que cela luy deuoit estre rendu, & que sa charge de Secretaire d'Estat luy seroit aussi rendue.

Quelque rigoureux traictement qu'il receust de son Roy , son affection

euers sa memoire n'en fut iamais vlcée. HENRY LE GRAND me disoit vn iour l'estrange resolution que ce prince auoit eu contre le duc d'Alençon son frere, & me commanda de ne l'oublier en son Histoire, disant estre *necessaire de remarquer les fautes des Princes? afin que ceux qui viennent apres eux ne s'egarent au chemin où ils se sont perdus.* I'endressay le discours & le monstray à VILLEROY, pour le sousmettre à son iugemēt. Il me dit n'auoir iamais oui parler de cela: Le Roy scachāt ceste response me dit, *Vous me deuez croire par ce que ie dis la Verité, & deuez louer MONSIEUR DE VILLEROY qui ne l'a voulu dire au preiudice de l'honneur de son maistre.* A cela se raportā la repartie qu'il fit à Tinteville luy disant qu'autre que luy n'estoit capable de faire l'Histoire de ce temps là, *Je suis, dit-il, trop obligé à la memoire de Henry III. pour l'entreprendre.*

Après la mort effroyable & tragique de ce prince, & dès le lendemain il enuoya vers l'un des plus confidens de son successeur homme expres qui luy represente que la durée de la guerre

feroit la dissipation de l'Estat, & ne dissimula point au Duc de Mayenne qu'elle ruinerait la religion, & aduanceroit le party de ceux qui la vouloient reformer.

Ce desir de Paix le rendit odieux à ceux qui vouloyent profiter à la guerre, les Espagnols descrierent ses bonnes intentions, les mauuais François l'appellerent Politique, & quoy que les villes en ceste furieuse licence receussent beaucoup de miseres par la guerre, & s'en fissent encores d'auantage par leurs partialitez, le nom de Paix estoit parmy elles si odieux que l'on tenoit les esprits pacifiques, pour Maheutres.

Ce fut en la fermeté de son esprit, & d'un autre grand courage & grand entendement que le Duc de Mayenne trouua le meilleur & le plus hardy conseil qui ayt iamais esté donné à Prince de faire prendre quatre des Seize qui par vn furieux traict d'Iniustice auoient deshonore cest Auguste Parlement. Par le mesme aduis il chassa vn petit Tyran de la Bastille qu'il auoit rendu l'arcenac de ses volleries, & en fin le Gouuernement

à vn braue homme, de qui HENRY LE GRAND a loué la constance & invariable fidelité, car il prisoit vn homme de bien en quelque party qu'il le rencontrast.

Comme il n'est pas difficile de conduire vn vaisseau qui a le vent en poupe, il n'est mal-aisé de donner conseil où il n'y a ny difficulté ny peril, mais les rudes tempestes esprouuent les bons Pilotes, & les grandes affaires les forts entendemens. Tel parut celuy de VILLEROY en ce grand orage, où il y auoit du peril & à donner son aduis, & à le refuser.

Il dit franchement au Duc de Mayenne qu'il n'y auoit que l'un de ces trois moyens pour pacifier le Royaume, ou de s'accorder avec le Roy : ou de reünir tous les Catholiques sous vn chef contre luy : ou de se ietter sous la protection du Roy d'Espagne. Le troisiésme estant perilleux contre les loix du Royaume, & l'humeur des François, & le second fort difficile, les Princes du sang demeurans estroitement vnis pour l'interest de leur maison, il conseilloit le premier a-

uec ceste condition que le Roy r'entre-
roit dans l'Eglise Catholique, & que ce-
luy qui en a les clefs luy en ouuriroit la
porte: Que sa Maiesté en seroit suppliee
par vne grande & celebre legation ; &
publiquement, pour iustifier ses armes
au cas qu'elle ne voulust entendre à ce
iuste moyen de la Paix. Le temps a fait
veoir combien on eust euité de miseres
en suyuant cet aduis. Ces ruisseaux de
sang que l'on a tiré de toutes les veines
du corps de la France eussent seruy à
cimenter de grands ramparts pour la
couvrir contre ses ennemis.

Ce seroit escrire l'Histoire que de re-
presenter ce qu'il fit en ce temps là , il
suffit de dire que le fruit de sa negocia-
tion fust la conference de Surenne qui
aduança la conuersion du Roy , puis la
Trefue qui fust suiue de la Paix, comme
la fille de la Mere. Les peuples ayant
gousté la douceur du repos ne voulu-
rent plus de trouble, le party du Duc de
Mayenne se trouua foible , & le secours
manquant chacun pensa à son salut.

A Pres la conuersion du Roy , il en-
tra au seruire de sa Maiesté, & cōme

Enee sortant du sac de Troye , apporta avec luy son Pere, son fils , & vne place importante qui seruit à la reduction des autres. Les plus sages blasmoient lors les opiniastrs qui fermoient les yeux à ceste naissante lumiere, & demandoient plus de ceremonie , à se reduire au deuoir , qu'ils n'en auoient apporté pour s'en separer.

Le Roy luy rendit sa charge de premier Secretaire d'Estat , & du mesme iour qu'il y rentra s'apperceut que l'ordre reuenoit aux affaires au grand allegement de son esprit. Il ne celloit de dire: *I'ay fait aujour d'huy plus d'affaires avec M. DE VILLEROY , que ie n'en auois fait avec les autres en six mois.* Il ne luy parloit iamais d'aucun accident pour estrange & inopiné qu'il fust qu'il n'en dist son aduis , fondé sur la raison ou sur l'exemple.

Il s'estonnoit qu'une telle teste sceust tant de choses sans y auoir rien mis en sa ieunesse de ce qui s'apprend par l'estude, ou de ce qui se tire des liures. Bien est-il certain que si cest entendement si fort & si vif eust esté cultiué par l'art & la

la science il fust reussy encores à plus grande perfection ; car quoy qu'on sçache dire la Theorie marche plus fermement que la Practique, & les livres *monstrent en peu de temps ce que l'experience n'enseigne qu'aux despens de plusieurs années.*

IL n'a iamais negocié avec personne qu'il n'ayt gagné le haut pavé. Nous auons veu des Ambassadeurs estrangiers qui estoient tenus en leur pays pour Intelligences & Demons en l'esclaircissement & discussion des affaires qui s'abouchans avec luy trouuoient que leurs subtilitez n'estoient que pointes d'arestes ou despics , chocquant la solidité d'un tel iugement : leurs discours que caprices , leurs artifices que formalitez. Ceux qui manient les affaires , se proposent tous vn mesme but , mais ils y vont par diuerses routes , & les vns plustost que les autres. Les Italiens par des discours profonds donnent bien auant dans l'aduenir : les Espagnols tirent leurs meilleures resolutions des exemples du passé : les François s'arrestent au present : mais la Prudence re-

garde les trois temps , & forme tousiours ses raisons sur la necessité du present , l'vtilité ou le dommage du passé ; & la preuoyance de l'aduenir.

Ceux mesmes qui n'ont esté ses amis qu'à demy , auoient qu'il auoit des qualitez peu communes , vne grande integrité espuree de toute auarice, vne grande modestie, vne exquise propriété , vne vigilance incroyable , ennemy du luxe, des nouueautez, & dissolutions. Il lisoit tout ce qu'on luy presentoit, ne remettoit les affaires au lendemain; nettoyoit tous les iours le tapis, & les iours & les nuits ne sont pas plus egaux sous l'Equinoxe que ses paroles & ses actions. Il apportoit dans les broüilleries plus pressantes , le mesme visage qu'il monstrois aux plus grands contentemens de la Cour. Le bruit ne l'estonnoit point ne prestant son apprehension qu'aux craintes iustes & apparentes. Craindre tout c'est lascheté , ne craindre rien stupidité. De la mesme main qu'il presentoit le mal il donnoit le remede. Le Roy considerant ceste grace & dextérité disoit souuent *Il faut aduouer que M.*

DE VILLEROY est vn bon seruiteur & bien agreable.

Il donnoit audience sans trouble, sans confusion, sans impatience. Ceste grauité que l'on rencontre de premier abord, s'adoucissoit en vne grande affabilité si necessaire à vn homme d'Estat, car les ames fortes se payent & se contentent de bonnes paroles qui n'escorchent iamais la langue, & se rebutent par la rudesse. Ceux qui se rendent difficiles & rabroüians, qui n'escoutent avec attention & patience, & ne respondent qu'en colere destruisent le seruice du Prince, qui est obligé ou de veoir & ouyr par soy-mesme, ou par ses Ministres qui sont ses yeux & ses oreilles. *Pensez vous, disoit Rodolphe, fondateur de la puissante maison d'Austriche, que l'on m'ayt esleu Empereur pour me tenir tousiours enfermé dans vne bouette.*

L auoit vne grande retenuë à ne precipiter ses conseils. HENRY LE GRAND luy proposoit vn affaire fort pressant & voyant sa froideur luy demanda pourquoy il ne parloit, Parce dit-il, que i'ay creu qu'il estoit question de

commander, non de parler. Il voulut auoir son aduis sur quelque occurrence qui regardoit vn Prince du sang, il respondit, Quand les Roys deliberent sur ce qui touche leurs proches, ils ne doyuent consulter que la Nature. *L'homme d'Etat doit sçauoir sur quoy, & comme il faut donner & refuser le Conseil.* En certaines choses c'est lascheté de se taire, en d'autres c'est temerité de parler, mais il n'y en a point qui permette de donner son aduis auant qu'on le demande.

Il donna au Roy ce bon conseil qui seruit grandement à fonder la Paix & destruire les pretextes de la guerre faisant venir à la Cour, & esleuer en la Religion Catholique, M. le Prince, qui estoit à Saint Iean d'Angely, afin que l'on vit clair en la legitime succession, car ceste incertitude mettoit dans les esprits la frayeur, & entretenoit la partialité dans les Prouinces.

LEs Roys sont tousiours Roys, mais aux diuisions ciuiles comme ils ne sont pas recognus en l'vn des partis, ils ne sont iamais bien obeys en l'autre. Ce Prince durant la guerre auoit esté sou-

uent contraint de faire le Carabin, vaincre au Cabinet par la douceur, premier que de combattre en la campagne par la valeur, faire icy le compagnon, & là le soldat. Les actions de la Maïesté demeurèrent obscurcies, comme la statuë de Minerue estoit voilee durant la solennité des Plyñtheries, ou comme tout estoit triste à Rome, tant que les Saliens ces furieux Prestres de Mars portoient les Ancyliës par les ruës. *A. V. in la. H. apud C. 1. 1.*

Quand il fut paisible ceux qui auoient vescu dans l'indifference, eurent peine de reuenir aux distinctions, & se remettre dans l'ordre : l'insolente presumption & l'orgueilleuse fierté, Symptomes ordinaires des esprits indociles & remuants ne se pouuoient ranger sous les loix de la modestie & du respect.

Le Roy s'apperceuoit bien du preiudice qu'il luy en reuenoit, car comme vne grande seuerité effarouche les affections, aussi trop de facilité abaisse l'autorité. VILLEROY luy dit, qu'un Prince qui n'estoit ialoux des respects de sa Maïesté en permettoit l'offence & le mespris : Que les Roys ses prede-

cesseurs dans les plus grandes confusions auoient tousiours fait les Roys: qu'il estoit temps qu'il parlaſt, eſcriuiſt & commandaſt en Roy. Cela ne s'estoit pas tousiours fait, il y auoit auparauant trop de reſpect aux paroles, trop de retenuë aux deſpeſches, trop de conſiderations aux commandemens. Il auoit ſouuent prié ceux qu'il deuoit menacer, recompensé ceux qui meritoient d'eſtre punis, & appaisé ceux qui l'auoient mis en colere.

Deſlors le Roy fit le Roy à bon eſciant, mit les plus difficiles ſous la diſcipline, & pluſieurs ſe trouuerēt au deſſous de ceux qu'ils vouloient preceder. La Maieſté qui ſouffroit ſi librement qu'on s'approchaſt d'elle & qu'on la preſtaſt deuint ſi delicate que pour peu qu'elle fuſt touchée elle monſtroit d'eſtre bleſſée. C'eſt pourquoy le Roy diſoit que VILLEROY luy auoit appris à faire le Roy, & luy en auoit plus monſtré en ſix mois qu'il n'en auoit ſçeu en ſix ans, Comme on luy demandoit quelquetemps apres s'il vouloit faire le feſtin des Roys au commencement

de l'année , il se souuint de ce que V I L L E R O Y luy auoit dit , & adiousta ; On n'a que trop fait les Roys. Antiochus Epiphanes Roy d'Asie pour auoir mesprisé la Maiesté & ne scauoir faire le Roy fust surnommé l'Insensé.

Il ne pouuoit apprendre ceste leçon d'un meilleur Maistre, car les Preceptes pour faire le Roy , ne se tirent que du regne , & il en faut voir plusieurs pour scauoir quelles en sont les fonctions. Celles des personnes priuees s'effuyent tous les iours, les royales ne naissent & n'esclattent qu'aux grandes occasions.

Comme Adaldague pour auoir esté Secrétaire d'Estat cinquante ans des trois Othons Empereurs, & Gaspard Schlick de Sigismon, d'Albert, & Frideric III. ont esté iugez capables de tous les devoirs des Empereurs, V I L L E R O Y qui auoit desia veu la Cour sous le regne de François II. & qui estoit entré aux affaires sous Charles IX. auoit manié les plus importantes sous Henry III. n'ignoroit rien des plus grandes sous

Henry III. pouuoit seul faire ceste Instruction.

Qui enseigne ce qu'il faut faire ne peut ignorer comme il se fait, c'est pourquoy on ne trouue pas grande difference entre ceux qui regnent & ceux qui monstrent comme il faut regner. Ils n'ont qu'un but, qui est le salut de l'Estat, les vns & les autres sont ordonnez pour seruir le public, & c'est pour cela qu'un Empereur Romain disoit que regner estoit seruir, & comprenoit ceste seruitude en trois mots, *seruir au Senar*, se soumettant au Conseil, *seruir à tous*, en recherchant le bien Public, *seruir aux particuliers*, en rendant le droit à chacun, & les gardant de tort.

De maniere que celuy qui sçait bien seruir le Prince sçait bien seruir l'Estat, qui sçait faire l'homme d'Estat sçait faire le Prince, c'est mesme chose d'ordonner ou de conseiller ce qu'il faut qu'on ordonne. *Tout ce qui sert à bien regner sert à bien conseiller celui qui regne.*

Traictant avec les estrangers il a tousiours monstté la generosité de son esprit. Nedit-il pas au patriarche de
Con-

Cōstātinople qui fit la premiere ouuerture de la Paix entre les deux Roys, pour-
suiue & acheuee si glorieusement par
les Chanceliers de Belieure & de Sille-
ry, que l'Espagne ne la pouuoit esperer
sans restitution & *parler aux Princes de
restituer, n'est ce pas augmenter la noy-
se.*

Qu'eust Roncas de luy, en proposant
le desir que le Duc de Sauoye auoit de
venir en France, sinon qu'il n'y seroit pas
le bien venu, s'il auoit intention de re-
tenir ce qu'il deuoit rendre. Apres le
Traicté de Paris il disoit, Nous atten-
dons tousiours si ce Prince accouchera
d'un bon mot. Et là dessus ses Ministres
disant que le Roy d'Espagne passeroit
en Italie pour deffendre l'heritage de
ses neveux, il repartit : *C'est ce que nous
desirons, car s'il faut rompre la cause est iuste,
& la partie en sera mieux faite & plus en-
tiere.*

Ceste loüable Passion de la grandeur
de ceste Couronne le rendit des plus
difficiles à l'eschange du Marquisat de
Saluce pour la Bresse, ne pouuant con-
seiller au Roy le raccourcissement de

sa frontière. Il consideroit que Henry III. s'estoit souuent repenty d'auoir rendu au Duc de Sauoye les villes de Pinerol, Sauillan & la Perouse, qui estoient les clefs du Dauphiné & Piedmôt, & que le Duc de Neuers pour ne sembler consentir à vn acte si contraire à la grandeur de ceste Couronne auoit demandé d'estre deschargé du Gouuernement des Prouinces de delà les Môts. Ce braue Prince deslors preuit & prédit que aussi tost que ceste porte seroit fermée aux François, celle des Grisons ne demeureroit pas long temps ouuerte.

Depuis qu'un Prince a quelque chose de l'autrui par le droit des armes, ou autre tiltre pour peu qu'il soit coloré, il n'est pas bien conseillé de le rendre. C'est la Maxime de tous les Princes, & n'y en a point de si consciencieux qui voulust blesser mortellement son Estat pour accommoder son voysin.

Vn Prince puissant, belliqueux & paisible, ne pense qu'à l'estenduë de sa frontière, & n'en void les bornes qu'au bout de son espee. On dit que Louys XI.

fit ceste responce à ceux qui parloient de la foiblesse de la frontiere de Picardie contre l'Angleterre : *Ne vous en mettez en peine, ma frontiere est bien plus auant.* Il vouloit dire que pour tenir les Anglois en Paix, il leur feroit la guerre en Escosse.

Comme il a monstté la fermeté de son courage aux estrangers, il a fait voir sa mesme generosité , en ramenant les suiets du Roy à leur deuoir : Il a monstté aux plus grands du Royaume que leur grandeur n'estoit qu'en s'humiliant aux volontez du Roy: qu'il n'y auoit autre salut pour eux que leur fidelité, que la qualité de premier Prince ne les dispensoit de celle de premier seruiteur du Roy.

Quand le Roy entreprit le voyage de Sedan, le Seigneur de ceste place se fiant plus en la bonté du Roy, & en la consideration de ses seruices , qu'en la defence de sa forteresse, desira de parler à VILLEROY, qui l'alla treuuer à Torcy. Le Roy durant leur conference disoit ces mots, ie luy ay enuoyé vn rude leurier. Il ne le flatta point, luy disant

que son mal-heur & sa ruine estoient en la resistance , son salut & son espoir en l'humilité & obeissance. Il rendit la place, & ce fut vn grand coup de l'esprit de VILLEROY : car l'interest particulier se rendoit general en la passion de ceux qui disoient n'apprehender autre peril pour ce Seigneur sinon qu'il eust aupres du Roy des ennemis qui le conseileroient de faire fumer de son sang les autels de Rome, en haine de sa Religion.

EN tout temps VILLEROY a preferé le seruice du Roy à toute autre pensee , oubliant les propres affaires pour celles de l'Estat , & de là est venue ceste grande preuve d'integrité qu'il n'a augmenté que de peu les biens que ses Peres luy auoient laissé.

Ses longs seruices , son travail assidu, la bienueillance de cinq Roys , pouuoient combler sa maison de si grandes richesses qu'on les comparast à celles de ce Citoyen Romain qui voyoit naistre & passer les riuieres dans ses terres. Son pere estoit Gouverneur de Pontoise, Meulan, & Mantes , Henry III. auoit

donné à son fils la Lieutenance au Gouvernement de Lyon, le Roy HENRY LE GRAND la luy rendit apres la mort de M. de la Guiche, le parangon des ames nobles, franches & genereuses, il a eu depuis le Gouvernement en chef, que M. de Vendosme tenoit. Et tout cela rapporté aux labours d'un tel seruiteur montre qu'aux maisons des Roys les recognoissances n'esgalent pas tousiours les grands seruices.

Et là dessus HENRY LE GRAND disoit, *Les Princes ont des seruiteurs à tout prix & de toute façon: Les vns font leurs affaires premier que celles de leurs Maistres, les autres font celles du Maistre, & n'oublient les leurs, mais VILLEROY croit que celles de son Maistre sont les siennes, & y apporte la mesme passion qu'un autre en sollicitant son procez, ou travaillant à sa vigne.*

Il ne faut esperer ny grandeur ny accroissement d'un Estat qui est gouverné par des personnes plus soigneuses de leur particulier que du public. Aussi faut-il que le Prince fasse les affaires de celuy qui sert, afin qu'il ayt l'esprit libre qui toutesfois ne le peut estre ayant en

la fantasie ce monstre de pauvreté. Philippe II. Roy d'Espagne disoit à Ruy Gomes son confident seruiteur : *Faites mes affaires, & ie feray les vostres*, comme apres sa mort on parloit de grandes richesses qu'il auoit laissé, il dit, l'ay creu luy auoir fait encore plus de bien.

Iamais homme n'eust plus de passion pour la reputation de l'Estat, que VILLEROY. Le premier point de ses instructions aux Ambassadeurs, qui alloient seruir le Roy hors le Royaume estoit de *conseruer religieusement le respect de la Maesté*, de ne rien dire imprudemment ny escouter laschement contre elle, & faisoit tousiours parler le Roy en ses despesches en Prince grand & redoutable, en termes elegans, mais tels qu'il faut pour estre bienseans aux Roys. En ses lettres particulieres il y auoit tousiours quelque traitt de gentil & qui sentoît son homme bien né, & nourry longuement dans le Cabinet des Roys.

Quelque grand credit qu'il eust, il n'abusoit de la bien-veillance de son maistre & ne l'ennuyoit de demandes importunes. Aussi quand il parloit.

pour quelqu'un, la seule recommandation estoit vne preuve certaine de mérite. Comme il n'auoit pas l'humeur portée à faire bien à plusieurs aussi ne vouloit il nuire à personne, & ne se mettoit iamais au deuant de la liberalité du Prince pour la destourner. *Ne faire bien à personne c'est auarice, mais empescher qu'un autre ne le fasse c'est cruauté.*

PLusieurs beaux esprits fussent demeurez incogneus, s'il ne les eust fait cognoistre & recognoistre. Il en a elleué aux premiers honneurs de l'Eglise, & entre plusieurs ie n'en veux choisir que deux pour l'exemple parce qu'ils furent de mesme promotion, & arriuerent là par deux diuerfes routes, l'un par le merite des lettres, l'autre par la cognoissance des affaires.

VILLEROY qui estoit aduerty de tout, recommandant le premier au Roy HENRY LE GRAND luy dit que sa grande doctrine auoit esté tellement admirée à Rome, au premier vóyage qu'il fit apres celuy du Duc de Neuers, que s'il y eust voulu demeurer, le Pape luy donnoit esperance de grands

biens & de grands honneurs. Il n'en fallut pas dire d'avantage pour resoudre le Roy qui avoit eu cognoissance de ceste verité en sa Conuersion, & en la conference de Fontainebleau.

L'autre estoit en telle estime à Rome que sans l'opposition du Peché Originel, il eut esté esleu Pape. Il disoit à ses amis qu'il estoit obligé du Chapeau de Cardinal à VILLEROY qui n'auoit pas tant consideré son merite que son desir de bien servir le Roy, afin que ceux qui auroient la mesme intention fussent asseurez de pareilles recompenses. Trois grands ornemens de la France qui ont eu les sceaux marque sacree de la Justice du Roy, n'ont pas celé que la recommandation de VILLEROY auoit seruy à leur merite.

IL ne loüoit point ceste vehemente passion à rechercher ny à corriger le passé. Il se teust au commencement de la poursuite qui se fit contre les Financiers, mais apres que la premiere ardeur fut rallentie il frappa dextrement son coup pour l'estourdir, & dit au Roy qu'il auoit tousiours remarqué plus de

trouble que de fruit en telles recherches, qui pour estre trop generales, enveloppent souuent l'innocent & le coupable, & troublent le repos des familles. Ce n'estoit pas qu'il ne desirast de veoir les abus corrigez & les esponges pressées, mais il y a des remedes qui empireront la maladie.

Il souhaitoit que le peuple eut moyen de respirer, & nos Roys si riches & puissans que tous les moyens extraordinaires pour auoir l'argent fussent abolis. Nos seditions & reuoltes ont multiplié les miseres du dedans & attiré les fureurs du dehors, ont causé les guerres qui ne se peuuent entreprendre sans argent, ne se finissent que par la Paix, & la Paix ne se pouuant acquerir que par les armes, on n'entretient les armes que par l'argent, & l'argent ne se peut auoir que par les tributs.

En ces grandes extremitez nos Roys ont esté contraincts de recourir aux extremes remedes, de tondre le pré tant de fois qu'ils l'ont voulu. Les charges se sont accruës & redoublées par l'accroissement des maux, en telle sorte que Philippe le Long se vit reduit en

des necessitez si violentes & pressantes, que pour en sortir il demanda la cinquiemesme partie du reuenu & du labour de ses subiets, sans limitation du temps & distinction de personnes.

L'opinion veritable de son intégrité, luy auoit acquis vne si grande creance, que non seulement ses paroles estoient considerees, mais encore on prenoit garde à son silence. Ceux qui flattent les Princes & tiennent que leurs vices sont des Vertus imparfaites appreuuoient par leur discours, vn dessein que VILLEROY dissuadoit par son silence. Ce Prince reuenant à foy, disoit que VILLEROY en ne disant mot luy auoit dit beaucoup de choses. Voila comme la seule contenance d'un homme de bien a de pouuoir.

IL n'a iamais rien fait d'important que sur son aduis, duquel il tiroit la cognoissance, & de ce qu'il deuoit faire, & de ce qui en arriueroit quand il seroit fait. Combien de fois luy a on ouy dire, VILLEROY me l'auoit bien dit, cela s'est fait tout comme VILLEROY l'auoit preu. On luy ap-

porta l'aduis que le Duc de Sauoye auoit fait arrester Roncas , *Sire* , dit V I L L E R O Y *D'Albigny receura le contre coup.* La ^{puissance}protection fut veritable, & marquoit la force d'un grand iugement.

Il voyoit si clair dans l'aduenir, qu'il y a plus de quinze ans , qu'il dit que les plus grands tiendroient vn iour à honneur de se trouuer au leuer d'un homme qui s'est perdu pour n'auoir eu vn amy qui luy dit à l'oreille ce que Pericles disoit tous les iours à soy-mesmes, *Prends garde à toy Pericles, tu commandes à des hommes libres, tu as affaires à des Atheniens.*

Vn vray amy (les grandes prosperitez n'en ont point) luy eut dit ce que Villeroy disoit à vn Prince ; Qu'il auoit souvent remarqué à la Cour, que les fortunes qui viennent lentement s'en retournent plus tard. Mais les fausses amitez ne les entretiennent que de faibles & de ces bouffees de vent qui emplissent les creuses imaginations. Les ames fortes & genereuses ne se laissent point beffler par la vanité. Ce sont Lyōs

qui pour vn temps se laissent mener où l'on veut tant qu'ils ont les yeux couuerts, mais quand ils ont la liberté de se recognoistre ils se rendent indomptables. Les mesmes Lyons se laissent parer de fleurs pour entrer aux spectacles, mais si leur ombre ou l'eau leur monstre que cet embellissement n'appartient à leur generosité, ils le mettent en pieces; il n'est bon que pour les bœufs lourds & stupides qui se laissent mener aux sacrifices.

SOn Cabinet a esté comme vne carte vniuerselle, on y a veu le plan des plus grandes entreprises de la Chrestienté, il y a peu de Monarchie & de Republique au monde qui n'y ayt eu affaire, çà esté l'Academie où les Princes du sang, & les autres Princes se sont rendus capables des choses dont l'ignorance ne s'excuse point.

On y a eu recours comme à vn Registre certain pour vuider les disputes des rangs, ordonner les ceremonies des actions plus solennelles de la Maiesté. Nul n'y est entré qui n'en soit fort y plus sçauant, les hommes d'affaires y ont

appris les Maximes d'Estat, les Ambassadeurs y ont pris leurs instructions, les chefs d'armées y ont receu l'ordre des desseins, les Gouverneurs des Prouinces, leur pouuoir.

Ses conseils ont si bien seruy à la conservation & duree de la Paix qu'il est à craindre qu'elle ne le trouue à dire comme le Pape Sixte III. disoit que la paix d'Italie estoit morte avec galeas Duc de Milan.

En ce Cabinet HENRY LE GRAND a renouvelé ses alliances avec ses voisins a esteint la guerre ciuille en l'Italie, à fondé le repos des Hollandois, à secouru ses alliez en Allemagne, à considéré tant de diuerses propositions pour la gloire de ceste Couronne, & la vengeance de ses iniures.

C'est en ce Cabinet que fut proposé le mariage d'eternelle benediction qui a donné à HENRY LE GRAND des enfans, les colonnes assurees de ceste Couronne, les desirs & l'ornement des estrangeres. Le Ciel auoit ordonné que nostre Hercule apres tant de glorieux labours se reposeroit au chaste sein de la

Princesse MARIE fille de François le Grand Duc de Florence, & de Iane d'Autriche fille de l'Empereur Ferdinand, honorée des deux plus hautes qualitez qui puissent orner vne ame genereuse estant femme de HENRY LE GRAND, & MERE DE LOVYS LE IVSTE.

Il ne tint qu'à elle que sa teste desia couronnee des lauriers immortels de la Vettune le fust encores de la premiere Couronne du monde, mais Dieu qui l'auoit deliuree au mesme temps d'une grande maladie l'a reseruoit pour la plus ancienne de la Chrestienté.

VILLEROY a esté l'un des trois, que HENRY LE GRAND recommanda avec tant d'affection & d'estime à ceste Princesse, & qui contre les discours & apparences humaines ont maintenu l'ordre aux affaires, le repos au Royaume durant sa Regence. Tant que elle a autorisé leur conseil, & soustenu leurs bonnes intentions, la Tranquillité, l'Abondance, & l'Obeissance, trois marques de la felicité des Empires ont fait fleurir le Royaume, Constantin le

grand s'estonnant qu'Alexandre Seuer
eust regné si heureusement estant venu à
l'Empire ieune, & estranger, car il estoit
Syrien, on luy respondit que Mammee
sa Mere auoit esté conduite & conseil-
lée par des personages de grande expe-
rience & probité, Vlprien, Iulius Paulus,
Fabius Sabinus, Ponponius. Ce fust sur
l'assistance des hommes de ceste qualité
& sur la conduite que Plotine femme de
Trajan dit en entrant au palais Impe-
rial & se retournant deuers le peuple,
*Telle que i'entre ceans, telle ie souhaite d'en
sortir.*

Vne teste coupee en la place de greue
estourdit & estonna la sedition & affer-
mit l'autorité de la Regence qui ne fai-
soit que naistre, & Villeroy iugea cét
exemple necessaire, quoy que l'alliance
l'obligea de rechercher plustost l'abo-
lition que la punition du crime.

ELle eut au commencement tant de
confiance en ses conseils, qu'elle les
estimoit faire vne partie de la prosperité
de la Regence comme Athenes ap-
pelloit Aristide la felicité de la grece.
Si on les eut suivis le premier mouue-

ment qui s'esleua contre le gouuernement se fust estoufé en sa naiffance, & le fécond n'eust passé onze riuieres, si on n'eust rompu la conference avec M. le prince.

Elle luy tesmoigna ceste grande & iuste affectiõ lors qu'elle le visita en vne grande maladie, disant qu'en ses deuotions apres qu'elle auoit prié pour l'ame du Mary, la vie du Fils, elle prioit pour la santé de Villeroy.

CEux qui ont les gousts si deprauez qu'ils quittent le doux pour l'aigre, le sauoureux pour le fade, & ne cherchent aux discours que les pointes de la Satyre diront que les viues couleurs de tant de qualitez rares & eminentes, qui sont en ce tableau deuroient estre rehaulseees par les ombrages des reproches que l'on a fait à l'original. Mais tout cela n'estant que de la poudre qui ne le gaste point ie les renuoye aux deux Apologies, qui rendent raison de tout ce qui a esté obiecté à sa reputation.

Il est vray que les hommes plus parfaits, ayans des imperfections, on a remarqué en luy quelque excez de grauité.

Il ſçauoit le grand aduantage que l'experience luy donnoit ſur les autres, & eſtoit fort ſoigneux de le garder, traittant avec les plus habiles de haut en bas, fort ſenſible & delicat à tous les traits qui portoient contre ſon iugement, prenoit plaifir de voir couronner ſes opinions, & ne les hazardoit qu'il ne fuſt aſſeuré qu'elles trouueroient de la creance ou de la ſuite.

Il me ſouuient ſur cela, que lors que la Royne Mere l'enuoya l'an MDCXII. vers Monſieur le Prince, & Monſieur le Comte pour les coniuurer de reuenir à la Cour, ils diſoient de luy, *qu'il eſtoit ſeulement capable au monde de donner à vn grand Prince vn HARDY*, FRANC ET BON CONSEIL, *mais qu'il auoit tant accouſtumé d'aller devant qu'il luy faiſoit de ſuivre.* Qui eſt des premiers ſur le theatre ſe faiſche de deſcendre pour les derniers venus. Il eſt bien rude à ceux qui ſont vieillies au ſeruice du Prince de ceder aux autres, ils ont touſiours en la penſée, ce que Ctéſiphon diſoit à *Æſchines*, *Vous iouez les ieux, & i'en faiſois la deſpence: vous eſcrimiez, & ie parlois: vous eſtiez lutteur, &*

i'estois spectateur : vous failliez & ie sifflois, vous faisiez vos affaires au Gouvernement & moy celles du public.

LEs traictez des mariages du Roy & de Madame le rēdirent odieux à ceux qui considerent la Couronne d'Espagne comme vn Comete à leur party. Ce fut lors que ses bonnes intentions furent descriees des vns, suspectes aux autres, & que la calomnie commença de les attaquer.

Comme Hercule quoy que fils de Iupiter n'a esté mis au nombre des Dieux premier que d'auoir combattu l'hydre, il n'arriua à ceste grande reputation d'estre l'Oracle de cet Estat sans auoir colleté ce monstre. Mais comme Hercule faisoit si peu de compte des mesdisances qu'il ordonna vn sacrifice, où il ne seroit adoré que par iniures, il s'en moquoit, & disoit à ses amis que *ceste sorte de Demons ne se chassoit que par le mespris.*

On luy apporta vn paquet surpris à Orleans qui alloit à l'assemblée de Thoneins tout farcy de plaintes & de reproches contre son honneur, estre blas-

mé pour auoir conſeillé ces mariages, & en preſſer l'exécution.

Il le monſtra à la Roynie encores qu'il fuſt en ſon pouuoir de le faire eſuanouyr ſans qu'on le viſt. Leçon aux autres de ne ſupprimer ny depeſche ny aduis quelque preiudice que leur honneur ou la fortune de leurs amis en puiſſent reſſentir, car il faut que le prince ſoit informé de tout, & ſon ſeruiſe emporte tous les reſpects & intereſts particuliers.

Il fut leu au Cabinet, & chacun admira la fermeté de ſon ame qui ne branla & ne s'eſmeut à de ſi rudes attaques aux yeux du Roy, & de la Roynie, des Princes & des autres Miniſtres. *C'eſt foibleſſe d'eſprit ou conſuſion de crime d'auoir du reſſentiment pour vne iniurie que l'on ſçait ne nous pouuoir atteindre ny bleſſer.* Un dementy courrit tout cela.

LA fortune qui eſprouua la conſtance de Scenola, par le feu; de Fabricius par la pauvreté, de Rutilius par le banniſſement: tenta le courage de Villeroy par des moyens qui le deuoient maintenir, & ſes ennemis tirerent contre luy les fleſches qu'ils deuoient reſeruer

pour le deffendre. Comme il estoit odieux aux vns pour auoir conſeillé l'alliance d'Eſpagne, il fut blaſmé des autres pour en vouloir reculer l'accompliſſement, & n'approuuant l'eſchange du gouuernement de Picardie à celuy de Normandie, il veit en vn moment la faueur eclipsee.

Il ſe retira en ſa maiſon de Conſlans ſe propoſant d'acheuer au port, les anneés qu'il auoit vſées dans le flux & le reflux. Il auoit ſouhaité ceſte retraicte, & ce ſouhait entre rarement aux penſées des Courtiſans, qui plus y vieilliffent plus ils ſont ialoux de la Cour; car ils ſçauent que quand ces Eſtoilles tombent de leur Sphere elles perdent non ſeulement l'influence & le mouuement, mais encore la lumiere.

On ne luy laiſſa pas gouſter les delices de la ſolitude, on luy fit cognoiſtre que ſon abſence preiudicioit aux affaires, & que l'aſſemblée generale des Eſtats qui ſe tenoit lors à Paris eſtoit ſcandalifee de ce qu'on eſlongnoit du fils vn homme qui auoit ſi bien ſeruy le Pere.

Les gens de bien diſoient que le ſalut

du vaisseau estoit en doute puis que les bons pilotes n'y estoient pas asseurez: Quelle seureté y a-il en ses confusions? Et qui se meslera d'un Estat où Aristide est iniurié Socrate y est condamné, Aristote a peur de l'estre.

IL reuint au premier commandement de la Royne, protestant qu'il ne seroit iamais cause du retardement du seruice du Roy, & que le ressentiment de l'offense ne luy ostoit celuy du deuoir. Il disoit que le *seruiteur n'estoit pas bien aduisé qui se retiroit sur la colere de son Maistre.*

Il reuint doncques, mais il ne ramena pas ceste premiere creance, & demeura long temps que sa patience rongeoit ce que son courage deuoit deuorer, étant quelquefois precedé par ceux qui au parauant eussent tenu à honneur de le suivre: Mais comme il est mal-aisé de se passer de personnes si necessaires la Royne l'enuoya à Creil & à Clermont lors que le second mouuement commença à pousser & le mena en Guienne.

IL n'est pas raisonnable de laisser reposer vn grand entendement né pour l'action, & la vieillesse exige vne chose in-

iuste quand elle le fait retirer de la suite du prince, mais s'il n'est permis de se reposer à soixante traize ans, on n'est dispensé d'aller à vn voyage de deux cēs lieues, par les chaleurs plus violentes, à trauers les frayeurs des surprises, & des desseins ennemis, & d'en reuenir par les froidures plus extremes & insupportables, ie ne scay en quel aage il faut sacrifier au repos.

Ayant fait l'année precedente le voyage de Poitou & de Bretagne, la vieillesse & ses indispositions le deuoient excuser de cestuy cy, mais l'occasion estoit trop belle, le trauail trop honorable, le seruice trop necessaire pour en accuser vn homme qui disoit que le seruiteur ne se deuoit informer où l'on l'en-uoioit, se contenant de l'honneur du commandement ou de la suite, car il ne peut estre mal pourueu que le maistre soit bien.

Ces grāds voyages ont des difficultez dont les plus grāds qui trouuent leurs commoditez par tout ne s'affranchissēt point, & celles qui ne sont que ieu & plaisir aux ieunes sōt intolerables aux vieux.

C'est pour cela que Budee que le Roy François I. fit l'un de ses Secretaires pour l'obliger à le suyure & l'ayder à chasser l'ignorance & la barbarie, appelle la vie de la Cour fascheuse, insolente; & embarrassee. J'ay repassé souvent en ces voyages par ma memoire ceste belle & docte Epistre Latine qu'il escriuit à son fils pour l'excuser enuers ses amis de ce qu'il ne publioit vn volume de ses lettres; En voicy le meilleur; Je n'y scaurois entendre, non tant pour l'empeschement des affaires que pour les diuerses incommoditez de la Cour; & ceste estrange contrainte de changer souvent de lieu. Combien de fois pensez vous que depuis quinze iours j'aye eu moyen de m'asseoir pour lire ou pour escrire, en des maisons basses, estroites & où l'on ne void goutte, principalement quand la canaille s'en approche.

Je ne fais que courre. Il y a plus de mille pas du lieu où loge le Roy, iusques en mon logis, si logis se doit appeller, estre en mesme chambre pisle-mesle avec des paysans, leurs volailles & tout ce qui se nourrit en la basse-cour, auprès de mes cheuaux, & les coqs marquant les veilles de la nuict.

Je suis d'ailleurs contrainct d'aller aux premières tables que ie treuve & faut (selon qu'il se rencontre, & que les choses de la Cour sont inopinées) que ie fasse l'escornifleur. Les Cabarets n'estant pas tousiours dressez, ny bien feant aux honnestes gens, d'y aller, nous sommes contrainct de nous retirer en des cabanes, où la pluye entre de tous costez, & où il n'y a autre ameublement qu'à la Cynique. Si Budee l'un des plus grands hommes de son siecle qui porta Athenes à Paris, qui estoit Maistre des Requestes au temps qu'il n'y en auoit que huit, a souffert cela, il faut estre bien delicat pour se plaindre de sa condition à la suite de la Cour.

LEs premières ouuertures de finir la guerre s'estant faites à Bordeaux par sa dexterité, il fut employé à Poitiers pour faire la Trefue, & alla de Tours à Lodun pour y traicter la Paix. Negociation la plus scabreuse & difficile qui ayt iamais esté sur le tapis pour la diuersité des interets & la multitude des interessez.

Vn Marechal de France le preceda en ceste legation, deux Seigneurs du Conseil l'assistèrent. Tous ces discours estoient

estoyent des leçons & des Commentaires pour l'esclaircissement des occurrences plus douteuses. La loüable curiosité de l'un a remarqué & escrit ce qu'il disoit aux conférences & publiques & familiares, & le recueil qu'il en a fait contient des choses si rares & singulieres, que l'ignorance feroit tort à l'Histoire.

Reuenant de Lodun à Tours pour monstrier à la Roynes les espines qui accrochoient le traicté, il ne luy cela pas que les Princes se plaignoient de ce que l'on ne donnoit au Roy plus de cognoissance des affaires, & parlant à sa Maesté luy dit qu'il estoit temps qu'il en eust le soin & preferast *les plus importantes aux moins serieuses*, adioustant que quand les Roys negligeoient leurs affaires il se trouuoit tousiours quelqu'un qui les broüilloit, pour entreprendre de les faire.

Ce fust l'une des estincelles qui tombant en ceste ame royale y allumerent la resolution d'estre ce que Dieu l'auoit fait naistre. *Il est impossible que le Prince fasse tout, & honteux qu'il ne fasse rien.* Le Grand Chambellan du Roy de Perse en

tirant le rideau disoit : *Leuez vous Sire, & donnez ordre aux affaires dont Dieu vous a chargé.* L'histoire marque iudicieusement le matin, car ce n'est pas veiller aux affaires que d'y venir sur le tard.

La vigilance & la royauté sont nées ensemble, c'est l'œil sur le sceptre des Egyptiens. Est-il possible qu'un œil puisse dormir, sur la pointe d'un baston, ou sur le fer d'une lance. Les Princes, ou leurs seruiteurs comme les astres doiuent veiller pour ceux qui dorment, & pour se rendre capables de leurs affaires ils en doiuent parler souuent, & à plus que d'une personne, pour n'engager au iugement d'un seul le salut de plusieurs, cōme Alexādre Seuerē consultoit les Capitaines, pour les entreprinſes: les Iuges, pour les peines, & les recompenses, les hommes ſçauans, pour les exemples de ce qui se deuoit ensuiure ou euitter, les Pontifes pour la religion.

SI les contentemens que la Cour donne estoient tout purs, sans estre brouillez d'enuies, de soupçons & d'ennuits celui de VILLEROY apres le traité de Lodun deuoit estre tres-parfait

ayant finy vne miserable guerre que les gens de bien & la raison & par commiseration detestoient. Toute guerre doit estre tenuë pour le mal & la maladie, & la Paix pour le vray naturel & salutaire temperament de l'Estat. *Le Prince ne fait pas moins de faute en laissant passer l'occasion d'une seure & honorable paix, qu'en se precipitant cruëment & imprudemment en vne iniuste guerre.*

Mais pour auoir plus consideré au Traicté de Lodun l'interest public, que celui d'un particulier, il se vit au retour en telle desfaueur qu'il fut contraint de souffrir qu'on disposast de ses charges comme l'on voulut ; Il retint en ce precipice sa constance ordinaire comme les colosses pour estre iettez dans vn fossé ne perdent point leur grandeur.

Il donnoit à la Pieté les heures qu'il employoit autrefois aux affaires, & l'on s'estonnoit de le veoir entendre les sermons au temps que nos Roys prenoient plaisir de l'escouter. Autrefois il cherchoit Dieu à la Cour & il le trouue maintenant en la solitude. On ne peut estre en mesme tēps, dans Babylone & Ie-

rusalem, & qui est en celle-là doit toujours auoir vne fenestre de l'ame ouuerte du costé de celle-cy.

Après ce memorable coup qui a mis au port d'une parfaite tranquillité le vaisseau qui auoit trop long temps nagé sur le fer, on vit tomber en vn instant les armes des mains des princes, & les desseins d'un troisiéme party arrestés. Le Roy l'en aduertit incontinent, le fit venir au Louure & comme se iettant entre ses bras luy mit le soin entier de ses affaires & de son Estat.

Il luy monstra les lettres qu'il auoit fait dresser & que l'on tenoit toutes prestes sur ceste occasion pour les enuoyer aux Gouverneurs des Prouinces. Il les approuua: aussi estoient elles du stile d'une bonne plume & d'un noble esprit, qui preferant la fidelité deuë au Roy & à la patrie, à toute autre obligation, auoit deux ans durant conduit sagement & courageusement vne partie de ce grand & hazardeux dessein.

On auoit eslongé les vieux Ministres des affaires, ou plustost on auoit priué les affaires de leur bonne conduite, & les

trois principales fonctions de l'Estat estoient coulées & fondues en vne seule personne, le premier conseil que VILEROY donna au Roy fust de les remettre en leurs charges, & reſtablir le premier ordre.

Le Roy s'eſiouyt du retour de M. le Châcelier comme il auoit pleuré ſon depart, & les groſſes larmes qui tomberent des yeux de le Royne quand il prit congé d'elle à Bloys monſtrèrent la violence que ſon ame auoit ſouffert pour conſentir à ce changement. M. le garde des Sceaux qui les auoit rendu plus librement qu'il ne les auoit acceptez les reçeut pour la ſeconde fois de la main du Roy, qui loüa ſa vertu, & ſa Juſtice, laquelle ſemble à l'Euphrate qui ne deſtourne iamais ſon cours par la rencontre des plus hautes montagnes. Le Surintendant des Finances continua ſa charge avec la meſme intégrité, mais plus de pouuoir qu'au parauant: Le Contrerolle general des Finances fut rendu à celui auquel HENRY LE GRAND auoit fié, & qui a tant de rondeur, de prud'hommie & d'honneur en ceſte char-

ge, que les souhaits ne peuvent rien ad-
iouster au contentement que le public
& sa conscience luy en donnent.

IL alla à l'assemblée de Roüen & y
porta de bonnes penſes & de ſalutai-
res conſeils pour le ſeruiſſe du Roy & le
bien de l'Eſtat, ne celant point ſon deſ-
plaiſir de veoir qu'après ceſte grande
criſe la maladie ne s'en eſtoit allée du
tout. Il fit ce voyage à condition qu'au
retour il ne penſeroit plus qu'à en faire
vn plus grãd, & quitteroit les importu-
nitez de la Cour, & le bruit de la ville.
Entre tant de temples que Rome auoit
baſtis à ſes fabuleuſes deités celui du re-
pos eſtoit en la campagne Eſcriuant au
Gouuerneur de Lyon ſon fils il luy man-
doit qu'il fiſt ſes affaires le matin cõme
s'il eſtoit aſſeuré de le perdre ſur le ſoir.

Ses plus ſenſibles contentemẽs paru-
rent au mariage du Marquis de Vil-
leroi ſon petit fils avec la fille de M. de
Crequy, petite fille de ce B R A V E
M A R E S C H A L, le Demetrius de ſon ſiè-
cle, qui à l'aage de ſoixante & dix huit
ans a donné l'eſpouuante à la Lombar-
die. Il n'a iamais rien tant recommandé

à ce ieune Seigneur que le seruice du Roy, estimant que ce commandement comprenoit tous les autres.

Seruir le Roy, c'est faire la principale partie de la Loy, car qui ne rend à Cesar ce qui appartient à Cesar est iours en demeure de ce qu'il doit à Dieu, C'est le precepte que la Noblesse de France doit estudier iour & nuict, c'est l'or quel'oracle conseilloit de pendre aux oreilles de la ieunesse de Lydie:

Les regles qu'vn grand de ce Royau-
me donnoit n'agueres à son fils Officier
de la Couronne pour sa bonne conduite,
sont bonnes pour tous ceux qui veu-
lent marcher en innocence deuant le
Ciel, & en honneur sur la terre. I'estime
celles-cy des plus certaines: Rendez vous
suiers & assidu près du Roy aux heures que
vous cognoistrez luy estre plus agreable, confor-
més vous à ses volontez, recherchez ce qu'il
affectionne constituez voz principaux plai-
sirs à luy complaire & gagner ses bones gra-
ces. Pēser vous faire plus estimer par la grāde
despence qui par la vertu & parsimonie, cest
vn abus, voire vne folie. Frequentez les cōpa-
gnies vertueuses, vo^z exemptes des vicieuses &

desbauchees. Toute la Philosophie de l'Academie & de l'experience ne sçau-
roit fournir de meilleurs preceptes pour
faire ou maintenir sa Fortune en la
Cour.

INcontinent apres l'ouuerture de l'as-
semblee , la mort attaqua violem-
ment VILLEROY , mais elle ne le sur-
prit pas , car il s'estoit de longue main
preparé à ceste iournee , la derniere de
l'aage, la premiere de l'Eternité, & auoit
veu mourir deuant luy tout ce qui trou-
ble le contentement d'une douce mort.
Il n'y a que ceux qui se sont bien dispo-
sez à mourir qui vont alegrement & cō-
stantment à la rencontre de la mort.

Sa violence ne dura que deux fois
vingt quatre heures , sans qu'elle luy
ostast rien de la fermeté de son iugemēt,
ny de la force de sa patience , expirant
doucement dans l'esperoir & les essans de
la vie eternelle, & les preuues de la Pie-
té, qu'il auoit cultiué si religieusement
toute sa vie. Son corps estant ouuert
pour estre embaumé & conduit à Ma-
gny en la sepulture de ses Peres , on n'y
trouua point de sang, ayāt fait durer son

seruice iusques à la dernière goutte.

Le Roy en paroles dignes de la bonté d'un tel maistre & du merite d'un tel seruiteur , à monstté qu'il auoit à cœur ceste perte , & la souuenance de ce qu'il luy auoit recommandé en mourant. Le Prince qui perd vn ancien seruiteur capable de luy donner des conseils sans passion , & luy dire la verité sans flatterie est bien asséuré de la felicité de son Estat , si ses affaires ne se ressentent d'une telle perte.

INcontinent apres que VILLEROY eust rendu l'esprit , M. le Chancelier, M. le Garde des Sceaux , M. le President Ianin , qui sçauent que les vrayes amitez passent au delà du tombeau dirent au Roy qu'il ne pouuoit mieux tesmoigner qu'il auoit aymé le Pere qu'en affectionnant les siens. Le Roy fit voir ceste affection en mandant à M. d'Halincourt que *comme il auoit perdu en M. DE VILLEROY , vn bon Pere il auroit tousiours en luy vn bon maistre.*

Ses lettres du lendemain de ceste mort XIII. Decembre portent le regret de sa Maiesté. *C'est vne porte, ce son ses mots,*

que ie ressens particulièrement non seulement comme recognoissant & ayant esprouvé en diuerses occasions, avec sa fidelité & affection, les effets de la longue experience qu'il s'estoit acquise au maniement de mes affaires, & combien il m'estoit utile & necessaire. Il n'y a seruice si grand qui ne soit bien reconnu par de telles paroles, & l'on n'en scauroit trouuer de plus excellentes pour l'ornement de son tombeau.

Comme c'est imprudence en toute sorte de Discours de dire des choses superflües & hors de propos, aussi est ce preuarication de passer les necessaires. Je me tiédrois coupable de l'un & de l'autre si i'oubliais que le Roy par les memes effets de ceste affection commanda à M. le Duc de Ventadour & à M. le Marechal de l'Esdiquieres d'accorder le differend d'entre M. d'Halincourt, & M. de S. Chaumont, & que ce differend est si animé, que encores que les volontez des peuples demeurent bien vnies en ce qui regarde le seruice de sa Maiesté, & le salut cōmun, la passion neantmoins diuise les affections de plusieurs:

Que celuy que le Roy a tiré de son Cō-

seil d'Estat pour luy donner la surintendance de la Iustice & Police de ceste Prouince fit sur cela vne belle remon-
strance,

*Dõt les viues raisons de beaux mots empennees
S'enforcent comme traits dans les ames
bien nees,*

pour faire veoir que les suiets du Roy *pen* telles diuisions ne doyuent laisser courre leurs affections & iugemens apres les interests qui ne sont de leur cognoissâce, les reseruant entieres au seruice de sa Maiesté, aux necessités publiques, & à leur repos particulier, car toutes partialités aboutissent à la fin aux seditions.

Ce nom de VILLE ROY a esté si celebre par tout que la memoire y demeurera tousiours en tres-grand respect. Iamais les Cardinaux ne se treuuent aux ceremonies des mortuaires que pour les Princes, & neantmoins il y en a eu cinq BEVILAQUA, VICENZE, BONSY, VBALDINI, VRSINI, qui ont assiste à ses Obseques & à l'Oraison funebre prononcée doctement & elegamment par vn Iesuite à l'Eglise de S. Louys à Rome. L'Archeuesque de Lyõ qui fait la

si dignement & entend si bien le service du Roy , prit le soin de ce iuste deuoir: On y vid des Princesses Italiennes , plusieurs Seigneurs , grand nombre de personnes d'origine ou d'affection Françoises.

Voila ce que i'ay obserué sur la vie de M. DE VILLEROY pour l'estime que chacun doit faire de ses merites & services. I'y estois obligé ne pouuant perdre la souuenance de la recommandation qu'il a fait de mes escrits , du bon goust qu'il en a donné à HENRY LE GRAND , de la peine qu'il luy a pleu prendre , non de les veoir & considerer simplement , car chacun le pouuoit faire; mais de les corriger , ce qu'autre que luy ne pouuoit mieux faire. I'ay en cela souuent esprouué qu'il y a vn contentement incroyable de sousmettre son travail à vn grand & sincere iugement: car s'il le trouue bon on ne redoute plus les autres , s'il ne l'approuue on a soin de mieux faire; I'ay souhaité l'vn plus que l'autre , car *l'approbation est bien agreable, mais la correction est plus utile.* Je veux que la recognoissance de mon deuoir paroisse.

se icy, car c'est vne espece d'ingratitude de ne dire qu'à peu de gens le bien qu'on a reçu de quelqu'un.

Il ne manque au Roy de grands suiets pour remplir ceste place, & la France en la production des beaux esprits est le rameau d'or de la Sybille qui ayant perdu vne feuille en repousse vne autre, mais il y va bien du temps pour faire vn homme de ceste experience, & puis c'est vn aduantage incomparable d'auoir esté sous la discipline de HENRY LE GRAND, & remarqué comme il proposoit ce qu'il vouloit resoudre & executoit ce qu'il auoit resolu.

LA prospérité dont on a iouy les premières années de ce regne estoit encore des effects de la grâde Prudence & Magnanimité de ce Prince, qui dans le calme auoit preueu d'où pouuoit venir l'orage, & comme on le destourneroit. Elle eust peut estre duré dauantage, si on eust toujours tenu cet ordre, & ceux qui ont remarqué la difference des temps & des euenemens ont comparé les aduis de ce grand Roy, à la ville d'Athenes dont le climat estoit si tem.

peré qu'enquelque part dumõde où l'on se trouuaſt on auoit ſuiet de regretter vn ſi doux & ſalubre ſejour.

LA perte d'un bon ſeruiteur ne ſe repare pas facilement, il faut des ſiecles entiers pour faire des Villeroys. Auguſte en perdit deux qu'il ne retrouua iamais entre tant de millions d'hommes de ſon Empire. Ses legions furent auſſi toſt refaites que deſfaites ; La mer vid de nouuelles flottés où elle auoit englouty les vieilles : Les baſtimens ſe releuerent du milieu de leurs ruines plus ſuperbes & excellents qu'ils n'eſtoient, mais tãt qu'il regna on l'ëtëdit regretter Agrippa & Mecenas ne treuuant perſonne qui fuſt digne de remplir leur place.

Le me trompe, la perte d'un bon ſeruiteur ſe repare en quelque ſorte quand on ſuit ſes bons conſeils & que l'on obſerue les maximes que ſa longue experiëce a autorifées cõme Principes infallibles de Verité. Ce n'eſt pas vouloir peu de bien à l'Eſtat que de ſouhaiter que VILLEROY ſoit touſiours dans les affaires par ſes bons aduis,

puis que l'ordre des choses ne permet qu'il y soit en personne, & qu'il y soit principalement en l'observation de ce salutaire conseil qu'il a tousiours donné à ses Maistres, *D'aller au devant des esmotions: Ne negliger les legeres fautes pour n'en attirer de plus grandes.* Les premiers exemples de Iustice, & les premiers coups de vengeance sont les meilleurs & ceux qui portent sur les auteurs de sedition la destruisent. Phalaris fit vn seul acte de Iustice enfermant dans le taureau d'airain celuy qui l'auoit inuenté.

MAIS c'est assés. À l'histoire le surplus: Je n'ay plus que ce mot à dire. Il faut apres vn Excellent & libre discours publié à Rouen au commencement de l'assemblée dire que M. DE VILLEROY a esté le premier moteur des affaires d'Estat, le Miracle de Prudence & de Sagesse, la Sphere d'où sont descendues ces belles ames qui reçoient les cōmandemens du Roy, & en vn mot l'Archimede qui à fait mouuoir toute l'Europe, & qui cōme Archimede expira sur ses figures, est mort sur de grã-

88 REMARQ. D'ESTAT.
des & hautes penſees pour la gloire de
ceſte Couronne , & la reformation des
deſordres.

FIN

QVEM OMNES SVSPICIANT
ATQVE SEQVANTVR ERIT















